

## ZOMA MASINA - TAONA A



### *Noratrinalzynohonyfahotantsika*

Ry Kristianina havana, ny Zoma masina no hibanjinantsika bebe kokoa ny fijalian'ny Tompontsika. Marina fa isan'andro isika rehefa manao ny famantarana ny hazofijaliana dia mibanjina ny fijalian'ny Tompo sy mandray ny vokatry ny fijaliana dia ny dinam-pitiavana izay tanteraka tamin'ny alalan'i Jesoa sy ilay fampihavanana ao amin'Andriamanitra Ray

**Vakitenyl :** Iz. 52, 13-53

**Tononkira :** Sal. 30,

**Vakitenyll :** Heb. 4, 14-16, 5,7-9

**Evanjely :** Jo. 18, 1-40, 19,1-42

Trinite masina. Fampihavanana amintsika olombelona, fampihavanana amin'ny tontolo iainana, fahariana vaovao ny dikan'ny fijaliana niainan'i Jesoa Tompontsika. Fantantsika nefa fa Izy izay tsy nanota nanaiky ho fahotana mba ho tanteraka ny dinam-pitiavana sy fanekeh-pihavanana.

Fahariana vaovao ho antsika ny fankatoavan'i Jesoa ny sitrak'Andriamanitra, izany no fototra amin'izao fankalazana ny Zoma masina izao. Noharian'Andriamanitra hitovy endrika Aminy isika. Tanteraka indray izany ankehitriny tamin'ny fanoloran'i Jesoa ny tenany teo amin'ny Lakroa.

Mivelona indray ny v&ocirc;kasionsika hatramin'ny voalohany indray isika ka irahina eo anivon'ny sahan'i Edena dia Tranobe lombonana ny tany onenanantsika ity. Azontsika tsara ankehitriny ny dikan'ny Sinaody tapany faharoa : FIANAKAVIANA EGLIZY KELY MIARO SY MIKOLOKOLO NY ZAVA-BOARY. Vokatry ny famonjena no tanterahin'i Jesoa teo amin'ny Lakroa ka mihavana indray amin'ny tontolo iainana isika, mihavana indray isika samy isika, mihavana indray amin'Andriamanitra.

Raha mibanjina ny fijalian'ny Tompo isika dia mibanjina ny fanolorany ny tenany izay fankatoavany ny hitondra ny famonjena ho antsika ho fanatanterahany ny sitrapon'ny Rainy.

Ny lesona horaisintsika androany amin'izao fibanjinantsika ny lakroa masina izao dia ny tenin'i Kristy teo amin'ny lakroa hoe : "Aoka ho tanteraka amiko araka ny sitrakao". Raha manaiky hanatanteraka ny sitraky ny Ray isika dia hiditra ao amin'ny famonjena.

Tamin'ny fanombohantsika ny Herinandro masina dia niditra tao Jerosalema i Jesoa, toy izany koa isika satria mpiara-belona amintsika Izy. Ahoana àry ankehitriny ny tena dikan'ny fidirana ao Jerosalema ?

Tsy inona fa ny hidirantsika amin'ny fankatoavana an'Andriamanitra, ny sitrany dia isika hifankatia, hiombona Aminy ka handray ny fahamasinany. Ka ny fahamasinana dia ny fiombonana amin'Andriamanitra vokatry ny fijaliana iainan'i Kristy izay banjinintsika amin'izao Zoma masina izao. Azontsika eto ny fanentanana nataontsika teny amin'ny La Montagne : manao ny marina, milofo amin'ny fanasoavana. Ireo tokoa no mampiombona antsika amin'i Jesoa ka mitondra amin'ny famonjena. Inona tokoa no niseho ? Noho ny fijoroan'i Jesoa tamin'ny marina ary noho ny fahafoizana no nifantsihany teo amin'ny Hazofijaliana ka nahazoantsika ny famonjena. Ao anatin'ny fahamarianana sy fanasoavana no ahafahantsika mandresyny ratsy mikikyny fiainantsika ankehitriny.

Raha mibanjina sy manaja ny lakora masina isika, tsy hoe manompo sampy na manao teatra sanatria isika raha manao izany fihetsika izany fa manambara ny fidirantsika ao am-pon'i Jesoa.

Henontsika tamin'ny Evanjely teo fa nisy Rano sy Rà nivoaka tamin'ny fon'i Jesoa. Rà sy rano izay manadio antsika ka mampiombona antsika amin'Andriamanitra, mampiombona antsika samy olombelona sy amin'ny tontolo iainana ka fiainam-baovao no entintsika.

Ny fidirana ao Jerosalema fiadanana, Jerosalema fiainam-baovao dia tsy inona fa ny fanatanterahantsika ny sitrak'Andriamanitra, miaina an'izany sitrak'Andriamanitra izany isika ka hifanasoa, hitady ny soa iombonana, hampanjaka ny marina, hampanjaka ny fifankatiavana, izany rehetra izany ny satan'ny dinam-pitiavana sy dinam-pihavanana atolotr'i Jesoa ka ankalazaintsika amin'izao Zoma masina izao.

Raha manoroka ny lakroa masina isika, raha manaja ny lakroa masina dia toy ny miditra ao am-pon'i Jesoa, koa aoka àry ho fo vaovao no horaisintsika amin'izao Zoma masina izao.

Fo izay mitempo ny tena fitiavana, ho "chapelle" famindram-po isika amin'ny toerana misy antsika tsirairay avy any, ho TABERNAKLA VELONA satria fo vaovao no entin'izao fanekem-pihavanana vaovao ataon'i Jesoa izao ka hampirindra ny fiainam-pianakaviana, ho Eglizy kely ho tempolin'Andriamanitra, ho EGLIZY VELONA VELOMIN'NY BATEMY MIOMBONA MIARA-DALANA KA MANDRAY AN-TANANA IRAHINA HO MISIONERA HO TABERNAKLA VELONA.

Mankahery antsika ihany ny fandrenesana ny Evanjely. Henontsika tokoa i Jesoa maniraka antsika handray an'i Masina Maria Reniny ary io no lalana sarobidy hanampy antsika bebe kokoa handray sy hanatona azy. Teo am-pototry ny hazofijaliana i Jesoa dia niteny tamin'i Maria hoe : "indro ny zanakao", sy niteny tamin'i Joany hoe : "indro ny reninao", nanomboka tamin'io andro io dia nandray an'i Masina Maria tao an-tranony i Joany. Nampirasihina koa isika tato amin'ny diosezin'Antsiranana tamin'ny fanomezana antsika ny "medaille mahagaga" misy ny sarin'ny lakroa sy Masina Maria mba handray an'i Masina Maria ao antokantranontsika tahaka ny nataon'i Joany. Miditra amin'ny alalany ao an-tranontsika tokoa àry i Jesoa mba hidirantsika ao Jerosalema koa.

Ny fidirana ao Jerosalema anefa tsy maintsy mandalo ny fijaliana ary izany no tsara handraisantsika an'i Masina Maria izay nanaraka an'i Jesoa hatreo am-pototry ny hazofijaliana. Tsy maintsy mandalo ny fijaliana sy fanadiovana ny fonsika. "Encombre" loatra

ny fontsika toy izany koa ny fianakaviansika sy ny fiaraha-monintsika ka mila omena toerana i Jesoa. Masina Maria no hanampy antsika hametraka an'i Jesoa eo amin'ny fiainantsika. Jesoa no banjinantsika amin'ny lakroa, koa aza misalasala mampiditra ao an-tranontsika ny lakroa mba hiditra amin'ny fiainantsika tokoa i Jesoa ilay mpiara-belona amintsika, ilay eo anivontsika tahaka ny nataon'i Joany nandray an'i Masina Maria. Ampianarin'i Masina Maria isika hahay handray an'i Jesoa, ampianariny ho Kristianina mpiara-dàlana sy mpiara-belona amin'i Kristy ka amin'izay ny fiainantsika hiova tokoa, hiova ho tsara na dia mety hamparary aza indraindray. Ny fanadiovana tsy mandeha ho azy fa mila finiavana, mila fahavonona, izany no ambaran'i Jesoa nanolotra ny ainy teo amin'ny hazofijaliana. Manolotra ny aintsika miaraka Aminy koa isika, koa na dia mijaly aza isika dia hiara-hitsangana Aminy satria voasasa ny fahotantsika. Henontsika tamin'ny vakiteny teo ireo olona naneso an'i Jesoa, tsy maintsy ho voaeso koa isika Kristianina manara-dia an'i Kristy. Fantaro fa izany no làlan'ny famonjena ho antsika araky ny voalazaamin'ny taratasy ho an'I Hebrìo : “ dia nianatra ny fanekena tamin'ny fahoriana niaretany, na dia Zanaka aza; ary ankehitriny, efa tonga amin'izay fanaperana Izy, ka tonga fototry ny famonjena mandrakizay ho an'izay manaiky Azy . Zary famonjena ho antsika tokoa i Jesoa ary izany no antenaintsika satria mpiara-belona amintsika Izy. Koa na inon-kidona na inon-kihatra dia ao amin'i Kristy isika, miaraka Aminy miditra ao Jerosalema izany hoe miditra amin'ny fiadanana marina. Iriko ho antsika mianakavy amin'izao fibanjinantsika manokana ny fijalian'ny Tompo izao izany. Raha manaja izany isika dia miditra amin'ny tena fiainam-baovao. Mitodika aminao izahay Masina Maria mandrosoa ao an-tranonay mba ho Reny Mpanabe anay hitarika anay ho any amin'i Jesoa na dia sarotra aza izany indray. Ampio izahay hifikitra amin'ny Lakora fa io no lalam-pamonjena ho anay. Amen

Mompera Arseveka Ramaroson Marc Benjamin